

AKASHVANI AIZAWL

REGIONAL NEWS BULLETIN

HEADLINES (EVENING)

- 1. PWD Minister Pu Vanlalhlalan thla thar, October ni 30 atangin Aizawl khawpui kawng siamthat hna thawh tan a ni ang a ti.
- 2. Kumin August thla khan Mizoram sorkar chuan Taxation department kaltlangin chhiah chi hrang hrang cheng vbc 73 a hmu a, sorkar kum kal meka chhiah a hmuh tlem ber thla a ni.
- 3. Union Railway Minister Ashwini Vaishnaw leh Bihar Deputy Chief Minister Samrat Choudhary te chuan vawiin khan rel service thar tur pasarih an hawng.
- 4. Ramchhunga bawnghnute thar chhuah chu kum 10 kalta chhungin zaa 63 in a pung.



PWD MINISTER

PWD Minister Pu Vanlalhlalan thla thar, October ni 30 atangin Aizawl khawpui kawng siamthat hna thawh tan a ni ang a ti.

Vawiin khan ZPM party pisaa chung inkhawmah thusawiin Pu Vanlalhlana chuan hun rei tak Aizawl khawpui kawng major repair ni tawh lo chu tha taka an siam dawn thu leh tuna Bawngkawn kawng tha tak ang hian siam vek an tum thu a sawi a; thla thar October ni 30-ah hna tan a nih dawn thu te, Hot Plant chu PTC Lungverh leh Lengpuiah din a nih thu leh kawngpui pawimawh laia hman tur lung phei chu Silchar lung tha lak luh an tum thu leh bituminous concrete a siam a nih dawn thu a sawi.

Aizawl leh Lunglei inkar kawng pawh an ngaih pawimawh thu sawiin, an thawk chhunzawm ang, a ti a; PWD hna ber chu kawng siam leh enkawl bakah, sorkar building sak leh enkawl a nih thu a sawi baw.

Pu Vanlalhlana chuan hmun hrang hranga kawng chhiate sawrkarin a ngaihven reng a, a zavaia siamthat vek a harsa a, a hmatiamin chak takin hma an la zel tih a sawi a; Khawruhlian khawtlangin harsatna an tawh pawh sawrkari a hriatpui thu an party thuchhuahah a sawi a ni.

Khawruhlian NGO Coordination Committee hian an khaw chung kawng chhia naktuk thlenga siam hna tan a nih loh chuan National Highway dan an tum tih an sawi hnuah PWD Minister Pu Vanlalhlana leh bialtu MLA Pu Lalbiakzama,

Assembly Speaker-ten nimin khan sorkar hmalak tum dante an sawipui a, Pu Vanlalhlana chuan khawtlangin hna chhunzawm rem an ti tlang a nih chuan kawng siam chu chhunzawm leh nghal a nih tur thu a hrih a, hemi avang hian Khawruhlian chuan kawngpui dan an tum chu an thulh leh rih ni a thudawn a ni.

<><><>

MIZORAM POOR FEDERATION

Mizoram Poor Federation chuan Chief Minister hnenah vawiin khan lehkha thehlutin, sorkar hna thenkhat pawl 10 pass chin dilh theih tura tihte chu pawl 8 pass chin dil theih tura tihniam turin an ngen.

Mizoram Poor Federation chuan Chief Minister hnenah hian khawsak harsatna vanga pawl 10 zir thleng phak lo ten Police leh Excise constable-te bakah department hrang hranga Group D leh driver hna lak turahte hna an dil ve theih nan ruahmanna siamsak turin an ngen a; Chief Minister hnena an thil ngen hi Home Minister hnenah pawh an lo thlen tawh thu an sawi.

Byte - Mizoram Poor Federation President (1)

Mizoram Poor Federation hruaitute chuan vawiin khan Aizawl Press Club-ah thuthar thehdarhtute an kawm a; Mizoram Universal Healthcare Scheme leh CM Special Package-a sorkar hmalakna fakin, Synod Hospital-in MUHCS a zawm tur chu miretheite tan thil lawmawm tak a nih thu an sawi.

An pawl President Pu Lawmthanga chuan, Health Care chungchangah hian sorkar kaltate laka miretheite beiseina a bo hnuah ZPM sorkarin Mizoram Universal Healthcare Scheme (MUHCS) a duang chu miretheite tan a thawnven thlak thu a sawi a ni.

<><><>

GST : TAXATION

Kumin August thla khan Mizoram sorkar chuan Taxation department kaltlangin chhiah chi hrang hrang cheng vbc 73 a hmu a, sorkar kum kal meka chhiah a hmuh tlem ber thla a ni.

GST atangin August thla vek hian cheng vbc 63 hmuh a ni a, kum 2 leh thla 5 chhunga GST atanga Mizoram sorkarin chhiah a hmuh tlem ber dawttu leh kumina GST atanga chhiah a hmuh tlem ber thla a ni baw.

(Voice cast - Correspondent)

Mizoramah kum 2023-24, 2024-25 leh, kumin 2025-26 kal mekah hian sorkar chuan GST atangin chhiah engemaw zat a hmu tawh a; hemi kum 2 leh thla 5 chhung hian sorkar chuan GST a hmuh tlem lai ber chu September 2024 kha niin, cheng vbc 61 a hmu a ni. Kumin sorkar kum kal meka thla liamta August thla khan GST-ah hian cheng vbc 63 hmuh a ni a; hei hi hriat theih chinah kum 2 leh thla 5 chhunga GST atanga sorkarin chhiah a hmuh tlem ber dawttu a ni.

Taxation department Monthly Achievement-in a tarlan danin, sorkar kum kal mekah April atanga August thla chhung khan kau hrang hrang atangin Mizoram sorkarin chhiah cheng vbc 568 a hmu a; a hmuh tam ber thla chu April thla kha niin,

vbc 179 a hmu. Chhiah a tlem ber thla chu thla liamta August kha niin, vbc 73 hmuh a ni.

<><><>

GST REFORMS

Sorkar laipuiin GST chhiah a tih hniamna, GST 2.0 chu Lungleiah pawh zawm an tum chho mek zel a,

Kan corr in Dawr lian Company thil zuarte a a be kual a, Insakna bungraw zuar te pawhin a theih ang chen chenah an zawm a, Cement chi hrang hrang awm mahse a tlangpui thu in bag khat man a tlahniam a, Rs 650 ni thin kha Rs 620 ah te a tla thla a, Rs 500 vel a hralh turte pawh a awm a, bungraw lo thleng thar tur te pawh a man a tlawm tur a awm tih an sawi.

(BYTE- Cement zuar)

Hetihlai hian Essential Commodities lamah Agent ten GST thar angin man tihniamin Wholesale dawrah te Bill siam tawh mahse Dawr te nau zawkah chuan a man tihniam a la ni lova, mipuiin thil man tlawmin heng Amul Gold, ha nawhna hlo leh thil dang neuh neuh chu rate hlui ang tho khan an la lei a ni.

(BYTE-Colgate consumer)

Sikret lamah erawh a manto a hralh ani thung a, Silk Cut bawm khar Rs 50 ni thin kha Rs 60 in vawiin khan zial zu tu pakhat chuan a lei tih a sawi a. Wholesale dawr neitu te chuan an thil zawrh tur ni 22 atang khan Bill an rawn tihniam a, mahse Agent thenkhat chuan an la tihhniam ve loh avangin, rate hlui an la hmang a, kan corr sawi danin, GST rate thar hi hrethiamlo an la tam avangin, GST chungchanga zawhna an dawnte chu ‘A buaithlak” tiin an chhang mai a ni.

<><><>

RAILWAY ACCIDENT:

Nizan dar 7:15 vel khan Kolasib District chhung Khamrang Rel kawng lei verh (Tunnel) No 35 bulah huan enkawltu Zonunzira (51) chu relin a chil a, a hmunah a thi nghal.

Zonunzira chiltu Rel hi Kolkata atanga Sairang pana tlan a ni a, Zonunzira ruang hi nizan khan Kawnpui Police Station ah lak ani a, vawiin hian Kolasib District Hospital ah Postmortem a ni.

Zonunzira hi Pu C. Lalthanzauva, Aizawl-a Greenland School neitute Huan enkawltu niin, hnam dang niin Mizoramah hun rei tak a khawsa tawh a ni a. A thian te nen an tlai leng chu vanduaiana a tawk ta ni a hriat ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

RAILWAY

Union Railway Minister Ashwini Vaishnaw leh Bihar Deputy Chief Minister Samrat Choudhary te chuan vawiin khan rel service thar tur pasarih an hawng. Vawiina an hawn zingah hian Amrit Bharat Express rel pathum an tel a. Heng relte hian Muzaffarpur leh Charlapalli inkarte, Darbhanga leh Madar Junction inkar leh Chhapra leh Anandvihar Terminal inkar an tlan dawn a ni.

<><><>

MILK

Ramchhunga bawnghnute thar chhuah chu kum 10 kalta chhungin zaa 63 in a pung. Kum 10 kaltaah khan bawnghnute tharchhuah hi tonne maktaduai 146 a ni a, tunah chuan kum khatah tonne maktaduai 239 thar chhuah tawh a ni. India chu khawvel pumah bawnghnute tharchhuak hnem ber ram niin khawvel tharchhuah hmun li a thena hmun khat dawn a thar chhuak mek a ni. Union Ministry of Fishery, Animal Husbandry leh Dairying chuan bawnghnute hian ram sum dinhmun zaa 5 lai a thawk chhuak tih a sawi a ni.

<><><>

SEVA PARV

Mipui rawngbawl leh sawrkar inrelbawl na tha thupuia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv hunah chuan Modia sawrkarin railway lama hmasawna a thlente tarlang ila. Prime Minister Modia hnuaiah kum 10 chhungin railway chu nasa taka thlak danglam a ni a. Tunah chuan rela zin veivah hi miin nuam an ti a, a him tawh bakah khawvel huap pawhah tha berte zing ami a ni tawh a. Kashmir atanga kanyakumari thlengin rel hmanga thlunzawm vek tawh a ni. Udhampur-Srinagar-Baramulla Rail Line a hawn tumin PM Modia chuan rel kawng hmasawna chu chak takin an thawk tih a sawi.

<><><>